

Poštovani vijećnici,

Uvaženi zastupnici, predstavnici institucija i političkih stranaka, poštovani sugrađani, dame i gospodo,

Imam potrebu da vam se obratim na Konstituirajućoj sjednici novog saziva Općinskog vijeća

Prije svega hvala Bogu i svima onima koji su nam omogućili da u slobodi i demokratskom ambijentu živimo u domovini Bosni i Hercegovini, da bez nasilja i terora razmišljamo i odlučujemo o sudbini svoje zajednice, svoje općine i time svih nas! Želim čestitati svima koji su danas svečano preuzeli dužnost, vijećnicima, Predsjedavajućem, zamjeniku. Želim vam mnogo uspjeha u obavljanju dužnosti i ispunjenju emaneta koji ste preuzeli.

Čestitam i svim učesnicima demokratskog procesa – lokalnih izbora. Bez obzira na određene manjkavosti, bez obzira na atmosferu koju ponekad prati predizborna kampanja sa negativnim elementima... bez obzira na prisutno uvjerenje u javnosti da izbori ništa ne mijenjaju... smatram da moramo poštovati i cijeniti slobodu izbora koju imamo u Bosni i Hercegovini i s ponosom se sjećati svih onih koji su se za nju borili. 2. oktobra 19500 građana s pravom glasa je reklo šta misli o našim idejama, našim planovima i vizijama, šta misle o našem ranijem radu i nama samima. Na nama je da to poštujemo i radimo shodno toj volji.

Izražavam zahvalnost svima koji su mi ukazali povjerenje da dužnost Općinskog načelnika obavljam u novom mandatu. Uložit ću sav svoj trud i energiju da opravdam to povjerenje, da čuvam ugled i integritet općine Tešanj i svih njenih građana!

Današnjim danom, okončan je mandat Općinskog vijeća i Općinskog Načelnika iz prethodnog saziva, 2012-2016. Tačno, prije 4 godine, 16.11.2012., preuzeo sam dužnost od načelnika Fuada Šišića, dugogodišnjeg i vrlo uspješnog načelnika općine Tešanj, od kojeg sam učio bezbroj dobrih stvari. Hvala mu na svojoj podršci koju je pružao u prethodne četiri godine. Hvala Općinskom vijeću, političkim strankama koje su aktivno pomagale, javnim institucijama, dužnosnicima, brojnim aktivistima u mjesnim zajednicama, poslovnim partnerima. Hvala privrednicima, vjerskim zajednicama, udruženjima građana, sportistima, kulturnim radnicima, medijima. Hvala mojim saradnicima, pomoćnicima i svim uposlenim u organu uprave. Jednom riječju, hvala svima koji su dali svoj doprinos da općina Tešanj u prethodne četiri godine ide putem napretka i razvoja. Svi koji su pomagali imaju pravo na uspjeh i radost, jer je to uspjeh svih nas, naše zajednice.

U sjećanju iz prethodne četiri godine ostat će mi mnogi problemi i izazovi s kojima smo se suočavali, brojne prepreke i nepredviđene okolnosti. Ostat će mi sjećanje na brojne projekte na koje ću biti ponosan, ali i na brojne institucije i ljude koji su svojim namjerama i aktivnostima radili na dobrobiti svih nas. U novi mandat neću nositi negativna iskustva, teške riječi, neslaganja. Prije četiri godine sam preuzeo mandat od Fuada Šišića, ovaj put preuzimam mandat od samog sebe. Nadam se da ću za četiri godine predati mandat nekom drugom.

Opraštajući se od prethodnog mandata imao sam potrebu da to uradim baš ovim riječima, na ovom mjestu i pred svima vama. **Ipak**, danas svi trebamo pričati o sadašnjosti i budućnosti. Od nas se to očekuje, mi imamo tu obavezu.

Stoga dozvolite da progovorim riječ dvije o Tešnju danas.

Tešanj je danas sinonim općine koja je u posljednjih 20-tak godina doživjela visok stepen razvoja. Taj razvoj je prepoznat u brojnim oblastima života. O Tešnju i tešnjacima se govori s poštovanjem, naši ljudi, naša znanja i kapital su bitan faktor u domovini Bosni i Hercegovini. Generacije i generacije naših predaka i savremenika su uradile puno velikih stvari za ovu općinu i njene stanovnike. Sve ovo povećava odgovornost svih nas danas, podiže ljestvicu, podiže očekivanja od svakog od nas.

Preuzimanjem certifikata od Izborne komisije, svečanim izjavama i izborom rukovodstva Općinskog vijeća možemo reći da je okončan prvi dio implementacije rezultata lokalnih izbora. Danas Općinsko vijeće i Općinski načelnik preuzimaju teret odgovornosti za vođenje i uređenje općine Tešanj. Taj teret nije ni jednostavan ni lahak. On u sebi sadrži brojne probleme naših sugrađana, brojne potrebe pojedinaca, i općine u cijelosti, velike potrebe i izazove sadašnjosti i budućnosti... Preuzimamo i sve dobre stvari i sve probleme! Ustavno uređenje i politički sistem nisu najsretnije riješeni u Bosni i Hercegovini. Uglavnom riječ politika ili političar nije baš omiljena. Mi u općini Tešanj moramo imati drugačije standarde. Moramo pokazati da se može časno i pošteno raditi za svoju općinu, za mjesnu zajednicu, za sve nas.

Naš problem i naša odgovornost je i sadašnji problem nekog pojedinca u bilo kojoj mjesnoj zajednici, a naše je i da radimo za izazove koje će općina Tešanj imati za 20 godina. Moramo sebi i drugima odgovarati na pitanja: **Jesmo** li dovoljno socijalno osjetljivi? Upravljamo li dobro javnim dobrima? Šta nam rade mladi i kako odrastaju? Hoćemo li imati dovoljno vode za 20 godina? Gdje završavaju naše otpadne vode, hoćemo li ostaviti budućim generacijama zdravu sredinu? Itd.

Na nama koji smo izabrani od naroda je da radimo na tome. Na Načelniku i na cijelom Vijeću je najviše odgovornosti. Javne institucije, javni dužnosnici, službenici i svi uposleni u javnom sektoru imaju obavezu da nam pomognu. A očekujemo da će podršku kao i do sada dati svi stanovnici ove općine na različite načine.

Svima nam trebaju bolji uslovi za život, više radnih mjesta, bolji putevi, više rasvjete, nova vodovodna i kanalizaciona mreža, više sportske i kulturne infrastrukture. Građani od nas očekuju rezultate, a ne izgovore i međusobne optužbe. Birači od nas očekuju odgovornost i profesionalnost, a ne neozbiljnost ili neodgovornost.

Ovo je prilika da se obratim novoizabranom Općinskom vijeću i svim političkim subjektima. Želim uputiti svima poziv na otvorenu i fer saradnju. Vrijeme kampanje i izbora je prošlo, sada je vrijeme da radimo na ostvarenju Strategije razvoja. Za četiri godine narod će nas pitati šta smo uradili i njih će interesovati rezultati. Zato napravimo rezultat sa kojim ćemo opravdati povjerenje za ovaj mandat, a neka građani nakon toga ocijene koliko je u tome neko pomogao. Svu energiju koju imamo možemo potrošiti u razvoju općine. Biću otvoren za saradnju sa svima!

Završit ću ovo obraćanje slijedećim riječima: Neka nam dragi Bog podari mudrosti i znanja da ovu zajednicu vodimo ispravnim putem i na najbolji način, a mi ćemo raditi ono što je u granicama naših mogućnosti. Neka naša djela budu dostojna prošlosti i budućnosti ove općine i svih njenih građana.

Općinski načelnik

Suad Huskić